

**Kommunit inatsisunik toqqammaveqarlutik illoqarfinni A/S INI-p errorsisarfinnik tamanut atugassanik matusinerata kingorna errorsisarfeeruttuni, errorsisarfinnik imminut akilersinnaanngitsunik ingerlatsisinaanerannik mattunneqarunnaarsillugit kommunit ingerlanneqarneri pillugit Naalakkersuisut maleruagassanik qulak-keerinninnillutik sulissuteqarnissaat pillugu Inatsisartuni aalajangiiffigisassat siunnersuut.**

(Inatsisartunut ilaasortat Ruth Heilmann aamma Anders Olsen, Siumut)

### **Akissuteqaat**

(Nunamut Namminermt, Pinngortitamut Avatangiisinullu Naalakkersuisoq)

Kommunit arlalinnik suliassaqarput, taakku ilaat inatsisini aalajangersagaallutik aamma suliassat ilaat inatsisunik tunngaveqanngikkaluarlutik isumagisassaapput kommuninut piginnaatitsissut naapertorlugu. Kommunit inatsisunik unioqquitsinatik errorsisarfinnik tamanit atorneqarsinnaasunik amigartooruteqartunik pilersitsisinnaatitaasappata aamma ulluinnarni ingerlatsisinnaatitaasappata inatsisunik tamanna tunngaveqassaaq, imaluunniit suliarineqartussat pineqartoq kommuninut piginnaatitsissummut ilaasariaqarpoq.

Errorsisarfinnik tamanit atorneqarsinnaasunik kommunit pilersitsisinaanerat aamma ulluinnarni ingerlatsisinaanerat pillugu inatsisunik iluarsisutut massakut peqanngilaq.

Qangaaniilli ileqquvoq kommunit suliassat tassaassut inuuniarnermi iluaqutissanik tunngaviusunik innuttaasunut, soorlu imermik, innaallagissamik kiammik il.il. pilersuinnissaq. Naak suliassat taakku suliffeqarfinnit namminersortunit isumagineqartaraluartut, kommuninut piginnaatitsissut malillugu kommunit suliassanik ilaatigut taamaattunik isumagisaqarnerat imaluunniit suliassat suliarineqarnerani peqataanerat inatsisunik unioqquitsinerunngilaq.

Kommuninut piginnaatitsissut paatsuunganartortaqaarsinnaasarpoq; isumaa annertusillugu imaluunniit qumartillugu atorneqarsinnaammat. Matumani malugineqassaaq nalilerneqarmat Danmarkimi kommuninut piginnaatitsissut aamma nunatsinni kommuninut piginnaatitsissut imminnut sanilliullugit assersuunneqarsinnaanngimmata. Suliassat kommuninut isumagineqartut inatsisunik aalajangersakkanik tunuliaqutaqanngitsut kommuninut nakkutilleeriaaseq aqutugalugu ineriartorsimapput, suliassanillu isumaginninnermi periutsit pissutsit piviusut aamma pisariaqartitsinerit tunuliaqutaralugit aallaavigalugillu pilersinneqartarsimapput, najukkani pisariaqarsimagaangat kommunimit isumagineqassat.

Kommuninut piginnaatitsissut naapertorlugu kommunit pilersuinermit isumagisaqarnissaanut piumasagaataavoq siunertarinqartup eqqortinneqarnissaa, tassalu najukkami pisariaqartitsisoqartoq. Ukiorpassuarni kommunit ilaatigut tamanit atorneqarsinnaasunik errorsisarfinnik amigartooruteqarfiusunik innuttaasunut atugasaqartitsisarsimapput, ilaatigut nunaqarfinni illuni sullivinni, taamaaliortoqartarneralu nakkutilliisutut pisortatut oqartussanit uparuarneqarsimangisaannarpoq. Kommuninut piginnaatitsissummut naleqqiullugu kommunip taamatut isumagisaqarnera illoqarfinni imaluunniit nunaqarfinni pinera apeqqutaanngilaq.

Tamanna tunuliaqutaralugu nalilerneqarpoq kommunit ullumikkut periarfissaqareersut inatsisunik unioqquitsinatik illoqarfinni, tamanit atorneqarsinnaasunik errorsisarfeerussimasuni, A/S Inissiatileqatigiiffik INI-p tamanut atorneqarsinnaasunik

errorsisarfinnik matusinerata kingorna peqarunnaarsimasuni, errorsisarfinnik amigartooruteqarfiusumik ingerlataqarnissaminnut. Taamaattorli taamaaliornissaanik kommunit pisussaaffeqarnerannik tamanna nassataqanngilaq.

Taamaattumik Naalakkersuisut inassutigaat aalajangiiffigisassatut siunnersuut itigartinneqassasoq, taamaaliornissamut periarfissaqareermat.